

1 Thesalonika

JANDIKO: Jaote Paulo

KAR NDIKO: Korintho

KINDE NDIKO: 51 KATA 52 E YIK RUOTH(AD)

Ne ondike ni jomoyie kuom Kristo mane ni Thessalonika mane en dala maduong' mar Macedonia. Paulo nooyudo ochako kanisa e dalani e wuodhe mar ariyo kuno kane olando injili.

Barua ni nondik e kind higa mar AD 51 kod 52.

Gik Manie Iye

Nene nitie weche mang'eny mane miyo Paulo ondiko baruani. Ne ondike mondo oteg Jokristo manyien mane ni Thessalonika, mane neno tem mang'eny. Ne odwaro mondo onyisgi kaka Jokristo dak, kendo ritore. Ne onyisogi ni mondo gi dhi nyime kod tijegi nyaka Ruoth Yesu duogi. Ne nitie ji mane puonjo ji ni onge ohand tiyo nikech Kristo chiegni duogo. Bende ne odwaro puonjo gi adiera mar geno Jo-Kristo matho ka oyie kuom Yesu.

THORRO

Sula duto mag barua mokwongo mar Thessalonika puonjo duogo mar ariyo mar Kristo. Sula mar ang'wen moloyo puonjo wachni (4:13-18). Paulo temo nyiso kaka Kristo en wuod Nyasaye kendo bang' dokne e polo obet e bat korachwich mar Nyasaye.

WECHE MOCHAN KAE GIN;

1. Goyo erokamano ni Jo-Thessalonika (1:1-10)
2. Rito tich jaote kaka entie/kata oonge (2-3)
3. Puonjo kod chiko Jo-Thessalonika (4:1-5:1-22)
4. Lemo mogik kod mos (5:23-28)

1 Paulo, Sila gi Timotheo, Ne kanisa mar jo-Thessalonika, mantie kuom Nyasaye Wuoro kod Ruoth Yesu Kristo: Ng'wono gi kuwe obednu.

Paulo Opako Yie Mar Jo-Thessalonika

²Pile waduokone Nyasaye erokamano nikech un duto, kwaluongo nyingu e lemo magwa. ³E nyim Nyasachwa kendo Wuonwa, wasiko kwaparo yie ma un-go mosemiyo utimo timbe mabeyo gi herau momiyo utiyo ne Nyasaye matek, kod geno ma un-go kuom Ruoth Yesu Kristo, momiyo uchung' motegno kutimo kinda.

⁴Nimar wang'eyo, owetewa ma

Nyasaye ohero, ni oseyerou, ⁵nikech Injili marwa ne ok obironu gi wach miwacho gi dhok lende, to nobironu gi teko kendo gi Roho Maler, kod yie motegno. Ung'eyo kaka ne wachalo ka wadak e dieru, ne wadak kamano nikech un. ⁶Ne uluwo kitwa kod kit Ruoth; kendo kata obedo ni ne usandoru malit, to nurwako wach mane oyalnu gi mor ma Roho Maler kelo. ⁷Omiyo nudoko ranyisi maber ne joma oyie duto man Makedonia gi Akaya. ⁸Wach Ruoth nolandore koa kuomu mochopo ok mana Makedonia gi Akaya kende: Sani koro yie ma un-go kuom

Nyasaye oselandore mong'ere kuonde duto. Omiyo wan koro onge gima wanyalo wacho kuome, ⁹nikech gin giwegi giwuoyo kuom kit rwak mane urwakowago. Ginyiso ji kaka nulokoru ubedo jo Nyasaye, kuweyo nyiseche manono, mondo uti ne Nyasaye mangima kendo maderia; ¹⁰kendo mondo urit biro mar Wuode koa e polo. Wuodeno mane ochiero oa kuom joma otho en Yesu, Jal ma resowa e mirimb Nyasaye mabiro.

Tij Paulo Ei Thesalonika

2 Un uwegi ung'eyo, owetewa, ni limbe mane walimougo ne ok obedo kayiem nono. ²Mana kaka ung'eyo, noyudo osesandwa kendo oyanywa e dala mar Filipi to kata kamano Nyasaye nomiyowa chir mar nyisou wachne maber e dier lweny gi akweda mager. ³Chutho, ok wahomb ji gi weche mag miriambo kata gi weche mowuok e paro mochido. Bende ok wan gi paro maling'ling' mar wito ji. ⁴To wawuoyo kaka joma Nyasaye owuon ema opwodho kendo oyiego kaka jorit Injili. Ok watem mondo wabed malong'o ne dhano, to wadwaro ni wabed malong'o mana ne Nyasaye-ma nono chunjewa. ⁵Ung'eyo maber ni kane wayalonu to ne ok wakonyore gi weche malombou mondo wawuondgo wang'u, kendo Nyasaye en janeno marwa ni ne ok wapando gombo maling'ling' e chunywa mondo wamau gigeu! ⁶Ne ok wadwar pak moa kuom dhano, bed ni gin un kata joma nadi.

Kaka joote mag Kristo, ne wanyalo miyou ting' mapek, ⁷to kar timo mano to ne wadoko mamuol e dieru mana kaka min nyithindo rito nyithinde mapod tindo. ⁸Ne waherou gi hera matut momiyo ne wamor, ok mana mar pogo kodu Injili mar Nyasaye kende, to koda ka ngimawa bende, nikech ne wagenou gi genruok maduong'. ⁹Adier unyalo paro, jowetewa, kaka ne wanyagore kendo watiyo matek, ne watiyo odiechieng' gotieno mondo kik wami ng'ato ang'ata

ting' mapek e kinde mane wadak ka wayalonu Injili mar Nyasaye.

¹⁰Un uwegi un joneno, kaachiel gi Nyasaye bende, kaka ne wadak e dieru ka ngimawa ler kendo nikare, kendo ka waonge ketho e kindu un joma oyie. ¹¹Ung'eyo kaka ne wakonyo ng'ato ka ng'ato kuomu mana kaka wuoro konyo nyithinde owuon, ¹²kwajiwou kendo wahoyou kendo wasiemou mondo kit ngimau mapile obed malong'o ne Nyasaye moseluongou e lochne kod duong' mare.

¹³Bende waduokone Nyasaye erokamano kinde duto nikech kane wakelonu Wach Nyasaye, to nuwinje murwake, ok ka wach dhano, to nurwake ka Wach Nyasaye adier mana kaka en. Wachno koro chopo tich Nyasaye e ngimau, un joma oyie. ¹⁴Nimar en adier, jowetena, nine ukawo kit kanise Nyasaye man Judea manie Kristo Yesu. Kaka jou uwegi nosandou e kaka kanise man Judea bende jo-Yahudi wetegi nosando, ¹⁵jo-Yahudigo ema nonego Ruoth Yesu kod jonabi maggi, kendo gin ema ne giriembowa oko. Ok gilong'o ne Nyasaye kendo giger gi ji duto, ¹⁶ka gitemo gi tekregi duto mondo gigeng'wa wuoyo ne Ogendini mondo oyud warruok. Kuom tim ma gitimoni, gimedo mana biwo richogi mondo opong'. Mirimb Nyasaye koro osejukogi!

Paulo Gombo Limo Jo Thesalonika Kendo

¹⁷Jowetewa, kane ochunowa ni nyaka wawere kodu kuom kinde machwok, (ne wapogore mana e ringruok to ok kuom chuny), gomb mane wagombougo matek osemyio watemo gi yore duto mondo waneu wang' gi wang'. ¹⁸Ne wasedwaro gaming'a mondo wabi walimu, to moloyo an Paulo ne atemo kendo atemo to Satan ne omona. ¹⁹Koso uparo ni gin ng'a gini mwakwano kaka genowa gi morwa, kata kaka osimbo marwa ma wanasungrego e nyim Ruoth Yesu Kristo koduogo? Donge en un? ²⁰Chutho, un e duong'wa gi morwa!

3 Emomiyo ka chunywa mane chandore ne onge kuwe ne waparo ni ber mondo wadong' kendwa Athen. ²Ne waoro Timotheo, ma en o wadwa kendo jatich Nyasaye kaachiel kodwa e tij lando Injili mar Kristo, mondo ojjuw chunyu ubed motegno e yie maru, ³kendo mondo kik sand mwayudo michunyu aa. Unge'yo maber ni kaka jo Kristo nyaka wayud sand. ⁴Chutho, kane wan kodu to ne wasiko ka wanyisou ni ne nyaka sandwa, kendo mano e gima osetimorenwa, mana kaka ung'eyo. ⁵Ma emomiyo kane koro ok anyal dhi nyime ka abet mos, ne aoro jaote mondo ang'e kaka yieu chal. Ne aluor ni dipo ka jatem osedonjore kodu mi omiyo tich mane watiyo matek e dieru obedo kaiyem.

Ripod Timotheo Kuom Chal Jo Thesalonika

⁶To koro Timotheo osebiro irwa koa iru, kendo osekelonwa weche mabeyo kuom yieu kod herau. Osenyisowa ni usiko uparowa gi paro mabeyo kendo ni un bende ugombo nenowa mana kaka wan bende wagombo nenou. ⁷Kuom mano, jowetewa, yie ma un-go osejiwowa e dier achiedh nade duto kaachiel gi malit ma waneno. ⁸Sani koro chunywa oduogo nikech uchung' motegno kuom Ruoth. ⁹Ere kaka dwagone Nyasaye erokamano nikech un ma dirom gi mor mawan godo e nyim Nyasaye nikech un? ¹⁰Odiechieng' gotieno walamo Nyasaye gi chunywa duto mondo olosnwa thuolo mar nenou kendo wang' gi wang', mondo wabi wapong'nu kuonde morem e yie maru.

¹¹Mad Nyasachwa kendo Wuonwa owuon, kod Ruodhwa Yesu, losnwa yo mwanalo birogo iru. ¹²Mad Ruoth mi herau omedre mi olandre e kindu ng'ato gi ng'ato, kendo ni ji duto, mana kaka heru mwaherougo bende otiak. ¹³Mad omi chunyu obed motegno mondo ubed joma onge ketho kendo joma ler e nyim Nyasaye Wuonwa chieng' ma Ruoth Yesu biroo kaachiel gi joge maler duto.

Ngima Mamiyo Nyasaye Mor

4 Mogik, jowetewa, ne wapuonjou kaka onego udagi malong'o ne Nyasaye, mana kaka ngimau chalo sani. To koro wakwayou kendo wajiyou kuom Ruoth Yesu mondo umed timo kamano moloyo. ²Nikech ung'eyo puonj mane wamiyou kuom teko mar Ruoth Yesu.

³En dwaro Nyasaye mondo ubed joma ler. Nyasaye dwaro ni ubed mabor gi richo mar chode, kendo ⁴mondo ng'ato ka ng'ato nyaka puonjire rito ringre e yo maler kendo man-gi luor, ⁵maok oyie mondo ringre oore gi gombo mathoth kaka jopiny makia Nyasaye timo. ⁶Kuom wachni, ng'ato kik ochwany nyawadgi kata wuonde. Ruoth biro kumo joma timo timbe makamago mana kaka ne wasenyisou kendo siemou. ⁷Nimar Nyasaye ne ok oluongowa mondo wadag e ngima mar dwanyruok, to ne oluongowa mondo wadag e ngima maler. ⁸Omiyo ng'ato ang'ata motamore winjo puonjni ok otamore winjo dhano, to otamore winjo Nyasaye owuon mamiyou Rohone Maler.

⁹To kuom hera ma jowete kuom Kristo onego oherreggo to ok wane tiende ndikonue, nikech un uwegi Nyasaye osepuonjou mondo uherru ng'ato gi ng'ato. ¹⁰Mana kaka kuom adier uhero jowete duto man e mieche Makedonia duto. Kata kamano wakwayou, jowetewa, mondo umed timo kamano moloyo kanyo.

¹¹Dwaro maduon' mar ngimau onego obed ni mondo udag e ngima mokuwe, ka urango mana tijeu kende, kendo kutiyo matek gi lwetu mana kaka ne wachikou, ¹²mondo kit ngimau mapile oywa chunyu joma pok oyie mi gimiu luor, kendo mondo kik uyiengru kuom ng'ato ang'ata e dwarou mapile.

Biro Mar Ruoth

¹³Jowetewa, ok wadwar mondo ukia gima timore ne joma osetho, kata mondo ubed gi kuyo ka joma moko, maonge gi geno. ¹⁴Wayie ni Yesu notho mochier oa kuom joma otho, omiyo wayie ni Nyasaye

biro chiero jomoyie duto mosetho kaachiel kode. ¹⁵Kaluwore gi wach Ruoth owuon, wanyisou ni wan ma Ruoth noyudwa ka pod wangima chieng' ma nobie, ok wanakwong dhi kapok okaw joma osetho. ¹⁶Nikech Ruoth owuon nolor e piny koa e polo, mi nogol chik gi dwol maduong', ka malaika maduong' kok, kendo ka tung' mar Nyasaye luongo matek; eka joma nosetho ka ni kuom Kristo nochier mokuongo. ¹⁷Bang' mano, wan ma pod wadong' kendo pod wangima noyudhwa kaachiel kodgi mi terwa malo e boche polo mondo warom gi Ruoth ei polo. Omiyo wanabed gi Ruoth nyaka chieng'. ¹⁸Emomiyo jiwreuru gi wechegi e kindu ng'ato gi ng'ato.

5 Koro owetena, onge tiende ndikou kuom ndalo kata saa ma gigo notimre, ²nikech un uwegi ung'eyo malong'o ni chieng' Ruoth nopore mana kaka jakuo poyo ji gotieno. ³E saa ma ji wachoe ni, "Piny okuwe kendo weche beyo," ema masira nopogie kadiemo wang', mana kaka muoch poyo dhako ma yach, kendo ok ginitony.

⁴To un, jowetena, ok un e mudho ma dimi odiechieng'no pou apoya kaka jakuo poyo ji. ⁵Un duto un yawuot ler, kendo un yawuot odiechieng'. Ok wan jo otieno kata jo mudho. ⁶Kuom mano kik wachal gi ji mamoko ma nindo, to wanenuru kendo waritreuru. ⁷Nikech joma nindo nindo gotieno, kendo joma mer bende mer gotieno. ⁸To nikech wan jo odiechieng', waritreuru ka waruakore gi yie kod hera kaka law akor mar lweny; kendo gi geno mar warruok kaka ogut lweny. ⁹Nikech Nyasaye ne ok oyierowa mondo wayud kum mar mirimbe mager, to noyierowa

mondo wayud warruok mar Ruodhwa Yesu Kristo. ¹⁰Nothonwa mondo kata ka wangima kata watho to wadag kode. ¹¹Omiyo jiwreuru ng'ato gi ng'ato kendo gerreuru, mana kaka utimono.

Weche Mogik

¹²Koro wakwayou, jowetewa, mondo umi joma tiyo tich Ruoth matek e dieru luor, ma gin jotendu kendo jopuonju kuom Ruoth. ¹³Migiuru duong' ahinya kendo hergiuru molooyo nikech tich ma gitimo. Daguru gi kuwe e kindu. ¹⁴Bende wakwayou, jowetewa, mondo usiem joma budho abudha, kendo mondo ujw joma luor, kendo ukony joma yomyom. Horeuru mos gi ji duto. ¹⁵Neuru ni onge ng'ama chulo rach kuom rach motimne, to temuru mondo kinde duto utim maber ne joweteu kendo ne ji mamoko bende.

¹⁶Beduru mamor pile; ¹⁷lemuru kinde duto; ¹⁸gouru erokamano kata piny ber kata rach, nikech mano ema Nyasaye dwaro ni utim ei Kristo Yesu.

¹⁹Kik utam Roho tiyo e dieru, ²⁰kendo kik ucha weche mokor. ²¹Temuru gik moko duto, kumako matek weche mabeyo. ²²Pogreuru gi gimoro amora marach.

²³Mad Nyasaye owuon, ma en Wuon kuwe, pwodhou mi udok maler chuth e yore duto. Mad orit ngimau gi chunyu gi ringreuru duto mi ubed maonge ketho moro amora chieng' ma Ruodhwa Yesu Kristo noduogje. ²⁴Jal moluougou biro chopo mano nikech en jaadiera.

²⁵Jowetewa, lemnwauru. ²⁶Mosuru jowete duto gi yogruok mar jomaler. ²⁷Achikou e nying Ruoth mondo une ni osom baruani ne jowete duto.

²⁸Ng'wono mar Ruodhwa Yesu Kristo obed kodu.